



跔雲去過家寮

該日下晝，天頂个雲時賁時薄，分人看毋真會係好天？還係烏陰天？為著愛蹶山，對市區駛三十公里个車仔去到山腳，斯毋會難。毋過，一路項成下仔雲遮日、成下仔出日頭，不時經過个雲團還會拂兜仔水下來，正係分人尷尬。薄雲，緊走緊遽，一陣陣仔在半天高飛等過，天頂該片還有一大堆等等看戲个白雪雲團；風，還煞猛來鬥鬧熱，咻咻滾吹往下，雲團遽手就先去遮挈東片析个山頭，留佢兜在石門山腳下，問強強就會捉得著个雲：「算來，愛喊佢兜行到哪位去正得？」

一剎時降下來个冷風膠路面還肯散个燒風先起勢共舞，佢兜放勢牯扭起屎窟花，扭出一個撈腹實落个細波螺皺風在大路項捩就係捩。漏仔形个風放勢牯捲，尖尖个風尾雖然分佢拉到斜斜，還係堅持愛優雅个躡等腳尾、揆著路面。思想，聯絡著細人仔時節輒輒經過个「波螺皺伯公」。哦，原來該尖尖个風尾就像係細河壩仔轉幹个所在，該層層緊捲个風，就像係一沿一沿个茶園坪。

龍潭這位，在桃園市个南片，頭過乜有當多个茶園，幹過銅鑼圈就係新竹縣地。既然雲講東片析个山仔佢愛早早揸佢兜睡目地，該就行去打鐵坑、在銅鑼圈幹過、跔牛欄河下，過家到新竹个鹹菜甕好哩。頭擺人講「有女莫嫁銅鑼圈，抔水煮飯一晝邊」，毋過這下个銅鑼圈既經有利便个水道水，一間間緊種个大工廠乜闊過頭過一行行个茶園坪。鹹菜甕，就係這下个關西鎮，毋知，歇在牛欄河脣、好食竹葉青个親家舅公啊，有健無？

仙草、鹹菜、番茄(toˋ ma doˋ)，你盡中意哪項？佢盡合意个，係關西清爽、淨俐个空氣。這擺恩對龍潭幹過來，另擺做得行高速公路直直在關西交流道下，無就去到大溪該片入山、行羅馬公路、跔鳳山溪下，一路巡水庫、看樹仔、享受無麼个人摻車仔个恬靜山色，都共樣會來到這位，有新式農業、老屋伙房个清幽所在。

入夜地，該樂線人家晒會燥个鹹菜乾啊毋記得收哩，驚怕會打著露水咧！無盡鬧熱个街路恬靜地、人尖人个遊樂園愛散棚地，高速公路排到淦淦个車尾燈就還瞞就係瞞、關西服務區个人龍乜還在該排列仔想愛買鹹菜乾爌肉便當，天頂个雲薄薄仔恬靜、雲縫个星仔羣羣仔嬌羞。夜深哩，恩兜都在共樣个月光下行寮。

作者：彭瑞珠

☆詞彙學習☆

【一剎時】idˋ sadˋ siiˋ：剎那，極短暫的時間。 【一沿一沿】idˋ ienˋ idˋ ienˋ：一層一層。
【躡等腳尾】ne denˋ giogˋ miˋ：墊著腳尖。 【羣羣仔】lo lo eˋ：稀少零落的樣子。

☆文法學習☆

【捩就係捩】lidˋ qiu he lidˋ：拚命轉個不停。V 動詞+就係+V 動詞，表示動作維持著一定的強度，不停進行著。

例 1：這細人仔還沙鼻哦，自家行就係行，毋會張(diongˋ)人揸。(這小朋友好棒喔，自己逕自走著，不會使性子要求人家抱他。)

例 2：毋好講就係講，講毋得煞，好睡目地！(別聊啊聊的，聊個不停，可以睡覺了！)